

四庫全書

集部

欽定四庫全書

集部

古今禪藻集卷二十二

詳校官庶吉士臣謝恭銘

主事銜臣徐以坤覆勘

總校官庶吉士臣倉聖脉

校對官原任編修臣勵守謙

謄錄監生臣任嘉春

謄錄監生臣蔣繼熊

欽定四庫全書

古今禪藻集卷二十二

明釋正勉釋性通同輯

明

五言律詩

西津

梵琦

八首

月滿潮來盛  
天空野望低  
樹侵吳甸北  
帆入楚江西  
俊鵬秋方下  
慈烏曉更啼  
即看霜露及  
風景色淒淒

贈江南故人

今騎沙苑馬昔踏洞庭魚結纜荷邊宿移家竹裏居好  
風橫笛晚新月上簾初每憶江南樂功名有不如

上都

王畿千里近御苑四時春苜蓿能肥馬葡萄不醉人  
衣明日月關塞絕風塵古有官名諫今無事可陳

其二

雙闕上雲霄層城近斗杓夜開金殿鎖晨赴紫宸朝  
月屋間浮蜺霜空好射鵬有官兼宰相誰復似嫖姚

開平書事

舊俗便弓馬新霜稱綺羅平原芳草歇古戍暮雲多翠  
袖調鸚鵡金鞭控駝上樓看月得無酒奈君何

其三

野外山橫塞天涯水遶羌登高一俯仰即事幾炎涼日  
晚雕聲急冰寒馬足傷我懷增感慨誰與細平章

漠北懷古

每厭冰霜苦長尋水草居控弦隨地獵剗木近河漁馬

酒茶相似駢裘錦不如健兒雙眼碧慣讀左行書

萬里

萬里故鄉隔扁舟何日還黃雲薊北路白雪遼西山馬  
倦客投店雞鳴人出關吾思石橋隱絕頂尚容攀

宿徑山天瑞院次虞侍講韻

來復

佛屋凌霄見僧鐘隔水聞石苔留虎跡山氣動龍文鉢  
自諸天送燈從白日分東游共清賞猿鶴每為羣

復師五言律亡之茲不及備選覺未完壁俟後  
同志者搜而續之庶不失師詩瓢中故物耳

古塞下曲

宗泐 十三首

候吏過輪臺傳言敵可推  
嫖姚揚旆出驍騎治兵來瀚  
海驚波涌陰山積雪開前軍正酣戰日暮氣雄哉

標山西齋雨中作

疎雨過高峯幽齋對碧松  
出山雲似馬落澗水如龍  
句向靜中得身於僻處慵  
小童林下至報有虎行蹤

故涇縣徐典史挽歌

白髮神仙吏黃塵八十齡  
竟同華表鶴俄失老人星  
甕

盡牀頭酒埃生案上經今朝來哭處墓草未全青

雙清士詩

有引

廬陵張君書紳歐陽君子剛宦遊四方同為湖省掾  
以清自勵大參蔡公嘉其操為署所寓邸曰雙清館  
而書紳先以滿告去子剛誠有不忍舍者予為雙清  
士詩以贈之

有美雙清客齊名湖省郎兩鳬相上下聯璧有輝光粉  
署朝同硯郵亭夜對牀涼風鳳池上羽翮惜分翔



登相國寺樓

冬日大梁城郊原四望平雲開太行碧霜落蔡河清欲  
問征西路兼懷弔古情夷門名尚在無處覓侯嬴

發秋風

曉發扶風縣雲低欲雪時長河王莽寺獨樹馬超祠營  
窟炊烟早牛車度坂遲非熊無復夢渭水自逶迤

雪嶺

邊城分壤處雪嶺白差我萬古消不盡三秋積又多寒

光欺夏日素綵爍天河自笑經過客相看鬢勿睹

屋舟

吳人舟似屋今子屋為舟四面水都繞百年身若浮下  
臨知有地中坐恐隨流夢裏天無際微茫發棹謳

次韻送徐伯廉歸南陵

把酒城南道離懷去住同鳥啼紅樹裏人出翠微中山  
雨添秋色溪雲度晚風倚樓相憶處明月各西東

大寧寺喜雨

何處新聞雨深山古寺中曉聲兼蟋蟀秋意在梧桐已  
覺人情喜深知歲事豐山翁病全減相對笑顏同

次韻東軒見訪

老結淮山屋重圍橡樹林鹿行巖徑窄虎飲澗泉深風  
雨人間事冰霜世外心夜來明月上擁毳一長吟

山水圖

絕境天成妙良工意匠能山腰上方寺樹杪獨行僧澗  
滿泉流迸雲虛谷氣蒸衡廬端可挹好上最高層

落葉

一片復一片西風與北風  
但看階下滿不覺樹頭空  
綴服猶堪用題詩自不工  
山童朝更掃閒委古牆東

元夕

德祥

上國當元夜金吾不禁行  
笙歌喧甲第燈火耀重城  
萬戶春同色千門月共明  
舉頭天路近不敢縱歌聲

吳江晚泊

宗衍

風壤三州接江湖一水分  
虹消滄海雨日落洞庭雲  
客

意終難盡漁歌實飽聞長思陸魯望不出可忘君

題珪上人山舍

無愠

紅葉填松徑清溪繞竹林西風雙鬢老落日半窓陰  
壤衲偏宜厚幽居不厭深竺仙遺偈在展卷且高吟

金山寺

守仁

神禹開天塹中流碣石存蓬萊分左股濫瀕失孤根  
驛騎催官渡風帆拂寺門甕城燈火近鐘鼓報黃昏

龍河逢祥師

道衍

十一首

自恨長為別逢時袂惜分道交非在酒禪悅不須文草  
宿龍河雨松留鳳閣雲夜窓承演妙默默似無聞

黃三謫欽州死於途次哀之以詩

萬里攜妻去危亡恨昨非身應隨地葬魂儼故鄉歸天  
末人家少雲深鳥道微招之不可得徒有淚沾衣

送友人之武林

我住城西寺君歸湖上山馬聲知驛路樹色認鄉關遠  
戍霜鴻慘荒汀雪鷺閒自憐隄畔柳愁緒不禁攀

重經常熟縣

鉅邑當吳北官無接送勞水多歸海近城半在山高僧  
寺餘庭柏人家盡野蒿重遊逢日莫惆悵促回舫

五九菊

采采薰風裏英英復傲霜占先榮午日應候媚重陽早  
晚還同色炎涼不改香兩開看總喜知爾越羣芳

芭蕉

清高與道合僧舍樹宜稠涼葉春陰積虛心夜氣浮題

嫌風處碎畫喜雪時幽有物皆凋謝非惟不耐秋

題張山人適樂圃林館

開牖依林樾迢迢去市遙翠低承雨竹綠碎受風蕉夕  
嶺還侵戶春流欲斷橋主人緣愛客時為出山瓢

讀孤山法師閒居編

孤山無復見展卷已知心落落潛夫詠皇皇古劍吟江  
雲陰遠嶠野雪霽高林莫謂千年後人間絕賞音

晚過師子林



無地堪逃俗乘昏復到林半山雲過磬深竹雨留禽觀  
水通禪意聞香去染心叩門驚有客想亦為幽尋

悼立禪師

一衲老雲深迢迢訃寂音不離生滅相已絕去來心壁  
冷孤峯影龕閒雙樹陰夕陽清磬響依舊滿空林

其二

未刻高僧傳名先入祖圖燈殘窓下暝履剩榻前孤宿  
靄封新塔餘香起舊爐蒼蒼泉上石遙對想跏趺

送僧歸重慶

天祥 二首

東西千萬里來去一身輕  
碧鳳山前別黃梅雨裏行  
江長巴子國地入夜郎城  
昔我經過處因君動遠情

挽遂光古先生

昨日來過我今朝去哭君  
那堪談笑際便作死生分  
曠達陶徵士蕭條鄭廣文  
猶憐埋骨處西北有孤雲

贈善世求禪人歸省

如蘭 八首

家在浙陽河扁舟載月多  
天空山接野木落水生波雲

物催歸興乾坤發浩歌少年才力俊亦足慰蹉跎

送進古道住廬山萬杉

雙劍倚青冥雲開九疊屏清猿啼野樹馴虎衛巖扃瀑  
乳飛晴雪江空落夜星雨花紛委處揮麈書談經

送曹應則歸省

壯志欲飛騰扶搖北海鵬雙親俱未老一弟已為僧遠  
水浮春棹虛窓坐夜燈明朝望鄉國遙指白雲層

送述曇緒住全福

憶過周溪上黃蘆夜泊船張燈留晚飯掃榻假秋眠天  
漢無雙月風平又五年羅雲多遠裔今古見才賢

送謙巽中住草堂梵安

萬里橋西路百花潭上居涼風生錦樹曉雨浥紅葉好  
著詒謀鈔重論止觀書扁舟時有使來往問何如

秋江送別

江柳不堪折江花照眼明天將孤雁遠風送一帆輕紅  
樹宜秋色黃蘆雜雨聲吳雲半千里如在月中行

張句曲小景

句曲有仙居桃源景不如樹根會繫艇石室舊藏書溪  
晚秋波淨嵐晴宿雨餘何當問真隱松下坐茅廬

黃鶴山人墨竹

水竹共清妍鮮飈動渭川鷓鴣啼楚雨帝子泣湘烟秋  
意生簾幕寒光照簡編百年空見畫黃鶴已成仙

閒行

大同 二首

散漫及春遊逍遙得自由在山常見鹿近水不驚鷗岸

口花初動崖根雪尚留翻憐今日樂塵世幾人愁

江村夕照圖

江村水國幽雲樹半含秋落日曬魚網涼風送客舟香  
杭黃早刈碩果熟先收官稅供輸外民歌樂未休

書懷

覺澄

利名非所欲人事頗相干冀北行無策江南住不安有  
時逢醉客何處告清官未到雲深處終身愧懶殘

經廢花徑寺

懷讓

畫壁暗塵凝  
蘿龕冷佛燈  
壞垣歌老樹  
古榻擁殘僧  
齋斷禽長散  
樓傾客畏登  
生涯同幻泡  
興廢總難憑

虎丘寺

普泰二首

欲覓闔閭墓  
風霜殿閣秋  
越平吳亦盡  
劒去水空流  
字缺碑銘古  
雲深竹院幽  
無心唯野鳥  
不解往時愁

秋晴

幾日豆花雨  
茲晨方見晴  
寒蟬依樹響  
秋蘚上階生  
山脫雲尤翠  
池涵日更明  
西風催萬戶  
都作搥衣聲

寓南高峰懷友

文湛 二首

菴住南峯下四簷松竹青月長陪入定猿或聽談經池  
近涼生榻山高影落庭故人在何處詩酒醉蘭亭

姚江廣濟寺寄瑞雪庭

江北倦行覽江南作勝遊乾坤雙短鬚山水一孤舟越  
鳥他鄉夢吳雲故國愁時清得幽賞不為遠公留

送毛明府令弟還鄉

廣澈

衆客送行客長亭復短亭輕塵浥細雨歸鴈度寒汀別



酒未成醉征車且暫停誰歌渭城曲腸斷不堪聽

秋夜

明秀

九首

微月澹滄海憑軒開北堂芙蓉近秋水風露濕衣裳一  
鶴過山去四星明帝傍巖棲有志士誰似接輿狂

官邸瞻雲

鵲沒天低處雲邊是故鄉眼穿嗟薄宦心切在高堂南  
浦連春草西山近夕陽秋風吹客思愁與路俱長

夜過康虛亭

金定四庫全書  
卷二十二  
竹裏溪光淨霜邊落葉繁能為真處士得共老丘園素  
業殘書在交期古道存虛亭一尊月相對幾黃昏

訪顧子重于瑞石山居

故人喜我至下榻掃烟蘿丘壑此心在文章如命何鶯  
聲花外老春事雨中過何日西湖上漁竿共草蓑

歸鴈

萬里隨寒暑南衡又北秦雲飛時避弋水宿更呼羣青  
草湖邊雨黃沙磧上春天涯未歸客愁向夜深聞

贈武夷徐羽士

浮丘學仙子祕法與誰傳  
玄牝長生地青牛小洞天  
御風乘鶴駕踏月弄漁船  
九曲春源上桃花紅欲然

田叟贈朱可麓

早起飯牛犢落花春水渾  
雨中青箬笠溪上白雲村  
食力古華野全生今鹿門  
不知城府外何處有桃源

野航

江空天上下茶竈帶雲濤  
一夜桃花雨五湖春水高  
斜

陽飛白鷺芳草亂青袍流向前灘去無風懶著篙

懷孫太白山人

病裏度僧夏詩篇憶舊遊空堂一葉雨涼思滿簾秋盡  
日書長把深山道自謀芙蓉正堪采誰為寄清愁

送大尹張公南溪

永瑛八首

宮殿春雲迴江潭客路賒官閒居小邑目極望京華善  
政纔三月深恩及萬家去時春滿縣猶喜見桃花

讀李崆峒集

土德秦關旺人文昭代生夜光歸合浦垂棘敵連城雲  
木衆禽寂陽岡孤鳳鳴澆風復淳古大路關榛荆

送高州申別駕

聖恩除別駕旌節向高涼官路八千里功名四十強青  
山臨越地秋月過錢塘霖雨隨公去銅魚草木香

秋浦

白露下蒹葭秋汀尚有花數峯迴晚色一鴈落寒沙菰  
熟供炊事鱸肥上釣槎月明吹笛去隔水是漁家

贈蕭山曹湘巖大尹

道學傳東魯詩文出建安探奇遊海上逸興宿雲端赤  
縣曾飛鳥丹山可駕鸞飄飄有仙骨豈肯在丘樊

勝果寺中峯閣用唐處默韻

古寺梯雲磴長松帶女蘿山空秋意早江闊晚涼多白  
鳥逾青壁紅霞閃碧波西崑昏磬罷猶聽采樵歌

結客少年場

結客少年場春風吹綠楊金鞭控白馬繡帶繫羅囊醉

月罷燕市看花向洛陽五侯七貴子並轡列同行

飲天風海濤樓贈公良

壁月花間出仙雲樹杪浮新醪留上客春夜宿層樓海  
色涵霄漢星文動斗牛只應天路接何必泛槎游

過子陵祠

祖福 四首

子陵辭漢室高臥此雲林釣石雲霄迴星臺歲月深烟  
開千嶂曉樹合半江陰不是論銖兩元無諫議心

大洋灘和雲東韻

亂山環巨谷衆水會高川宿莽乘春攬雲槎逆瀨牽沙  
烟衝鷺起潭日抱蛟眠晚飯分漁火青藜傍野然

杪歲感懷

急雨捎寒竹朔風吹散廬年陰看物化道屈念身餘短  
夢蕉中鹿浮生轍跡魚為農蔬水意垂老憶長沮

雨宿西閣

浩蕩迷方客仍淹江寺隈旅愁添夜雨歲事到寒梅滄  
海無家問中峯有夢回燭花何事喜更傍客杯開



宿雲居西麓菴

法聚 六首

遠徑通深麓，齋居小更幽。  
松聲四壁雨，湖影滿牀秋。  
世路迷真境，僧緣息妄求。  
開門漁遂近，明月在滄洲。

金山次唐人韻

世外金仙界，風光絕四隣。  
水空禪觀月，門斷客車塵。  
山訝浮來石，僧疑應化身。  
香燈雲閣靜，聽法有龍人。

贈樂耕處士

小隱鹿門遠，躬耕意自便。  
野花茅屋徑，春水石溪田。  
黃

犢林邊雨青蓑谷口烟社歌忘帝力人在太初年

上畦

腴壤開新圃春風小徑紆理荒無雜穢降種有嘉蔬碧  
澗雲邊甕青松雨後鋤風波機事夢不到丈人廬

過豐村侍御兄舊宅

寒原棣華落獨惜杖藜還世故浮雲外溪聲夕照間三  
年新白髮十畝舊青山回首風烟路啼鶯近竹關

獻花巖

行經佛窟寺更入獻花巖雲磴盤空翠杳林肅妙巖斷  
崖藤絡石欹閣樹撐簷回首鍾陵道烟花隔暮簾

人日客夜過

士墨

蔬盤作人日梅柳動春城月出海門靜客來山閣清杖  
藜憐白首性氣尚書生日日堪巖下看雲過眼輕

奉和沃洲呂公

果斌

梵苑來仙駕旌麾向日懸鳥棲雲外樹龍護鉢中蓮高  
論消禪癖留題紀宦年振衣丹嶠上幽思共泠然

亂後還鄉

方澤 七首

故鄉離亂後惆悵對斜曛  
宅燬猶餘竈林殘已露墳  
村原今昔改親故死生分  
獨有重歸客浮身尚似雲

送吳山人九湖還洞庭因簡方居士

落葉滿江邊秋風急暮蟬  
我思天姥寺君上洞庭船  
束帛丘園少徵兵澤國連  
不知方處士鍊藥幾時仙

諸友夜集得青字

楊子過談經山靈入夜聽  
月光浮几白露氣濕空青  
高

檻凭虛曠長林坐杳冥今宵河漢上應聚少微星

送徐山人玄嶠

去昔不可駐來今紛又過共憐衰謝日獨奈別離何雲  
擁吳門樹風連震澤波唯應明月夜相憶臥烟蘿

戰蟻

穴蟻構深爭荒城想未盟陣嚴如有令戰苦不聞聲蠻  
觸方虛國雄雌迭挫兵坐疑秦漢事吟對暮雲橫

宋華川早春見過因感其兄宜山茂才簡荻舟江

子

兄弟本差池孤鴻君最悲空留宋玉賦不及楚王知世  
事空流水春光又柳枝江淹饒別恨頭白見無期

輓錢公良太守

翰藻詞林重循良太史題故人留劔在幽壑去舟迷蒿  
里霜偏早楸原日易低至今公子輩悽斷夜烏啼

別田山人太室

正念

五首

石室開蒿少雲川俯鄧樊讀書久夏過春至不窺園傳

說還當世王符已立言臨風莫長嘯絕壑有清猿

焦先祠

未即焦山境先瞻焦隱君衣冠新物色殿宇舊風雲  
洞鎖千年藥臺空三詔文紛紛鷹犬類難與鳳為羣

送陳給事使南海

天位北樞峻地圖南海遙冠裳昭日月書冊下雲霄  
鳳闕三年使蠻江八月潮星槎仙並得直欲奏簫韶

其二

浮海意飛揚濯纓歌慨慷山光盈掌握雲色動河梁  
服堯封遠江流禹蹟長車書原混一天子念遐方

其三

絕域天王使明時紫禁郎星辰傳鳳詔袞冕授蠻王  
蜃氣連朝合潮聲入夜長錦帆南海上鄉國有輝光

有懷逸姪不至兼復書遲

圓珂二首

之子來何日閒門獨倚時枝頭聞鵲噪天末看雲馳  
不  
是書來晚多因鴈到遲算沙河渚上相與白鷗宜



肇林社中漫成

千里同飛錫來遊長者園  
佩珠慚作丐止渴解求源  
逆立吾真恥忘機爾息喧  
從今逢貝葉懶向月中翻

慈雲嶺

圓理 三首

仄徑扳蘿轉空山伐木聞  
兩崖危石抱衆壑細流分  
曉竹含蒼靄春田護白雲  
回看萬松裏唯有鹿麋羣

招友人看芙蓉

一水澄於練孤芳錦作叢  
故將遲暮景開向寂寥中  
夕

露垂秋白江霞媚晚紅薄言方採掇持贈故交同

三月望日遲友看花不至

不信城東路其如萬里天坐消春一季愁見月三圓庭  
鶴遲人立林鶯喚友遷臨軒負觴詠為爾惜芳妍

春日寄鏡池上人

戒襄

香林春二月烟靄日冥濛洒徑桃花雨飄簾燕子風客  
來青嶂裏犬吠綠蘿中借問今支遁何如舊遠公

牢山訪憨山清公不值

真可 二首

吾道沈冥久誰倡齊魯風間來居海上名誤落山東水  
接田橫島雲連慧炬峯相尋不相見踏徧法身中

登那羅延窟

菩薩僧常住歸依上翠微山高疑日近海闊覺天低島  
嶼屏中國波濤限外夷重來防失路拂石一留題

五臺山居

德清 十八首

此身原是寄暫住即為生不屬人間有何拘世上名大  
千觀去小萬物自來輕破釜沈舟計而今借令行

其二

塵海誰能度空居我獨任風雲千載事水缺萬年心古  
木留春淺寒巖積雪深祗因貪縱目長踞最高岑

過龍泉關

策杖烟霞外重關虎豹林路當崎曲險山入塞垣深慘  
淡黃雲色蕭條落日陰邊笳如怨客嗚咽嶺頭吟

從軍 有引

余以弘法罹難蒙恩遣戍雷陽丙申春二月入五羊

三月十日抵戍所時值其地饑且癘已三歲矣經年  
不雨道殣相望兵戈滿眼疫氣橫發死傷蔽野悲慘  
之狀甚不可言余經行途中觸目興懷偶成五言律  
詩若干首第以久耽枯寂不親筆硯其辭鄙俚殊不  
成章而情境逼真諒非綺語聊紀一時之事云

萬里投荒日時方大火流經年頻望雨三歲不登秋蔽  
野驚人骨悲風動地愁天高難以問心折此淹留

其二

道殣非關歲窮愁孰啓予弄兵皆赤子荷鍤盡強徒烟  
火連村斷徵求隔歲儲舊聞多盜賊今見滿江湖

其三

楚澤非炎徼行吟愧獨醒瘴烟千嶺黑宿草四時青  
觸秋濤怒人斬癘鬼靈從來皆浪跡今日更飄萍

其四

出世還行役誰悲道路難長戈聊當錫短髮不勝冠沉  
瀣餘三島炎蒸癘百蠻天南回首處落日是長安

其五

此日天涯道艱虞祇自憐海風腥釀雨山氣毒含烟畏  
路從人後衝泥向馬前始知行役苦多在戍兒邊

其六

一息餘生贅千山去路長問途逢牧馬挾策偶亡羊衷  
熱三秋日心寒六月霜所經如蹈鑊安敢任疎狂

其七

幻跡元無住逢山即當歸因看前路窄轉見此生微時

抱桑間餓常懷漂母飢所欣無臘月不望寄寒衣

贈趙公子參軍

濟濟佳公子翩翩大雅風骨誇千里駿氣壓萬夫雄慣  
擊屠龍劍能彎射虎弓誰知天下士多在布衣中

晚歸營門

混俗希忘象臨戎想收羝前驅芟忍草左袒拗伽黎落  
日江容醉歸雲樹色迷行藏同倦鳥漸漸向飛低

庚子歲即事



豺虎中原徧星軺日夜馳詔無哀痛字人有向隅悲遠  
探驪龍窟深批弱木枝乾坤聊俯仰愁絕一雙眉

其二

青海初收捷朱厓始罷征劒門飛赤羽閣道走羌兵帝  
德懷柔遠王師恥戰爭蠻夷應繫長不見請長纓

其三

滿目黃塵暗披肩白髮垂江湖歸路杳鷗鷺傍人疑康  
濟思今日安危望此時從來貂珥重寧不愧恩私

宿清溪驛夢得草蟲鳴斷岸沙鳥宿寒汀之句因  
足成之

溯流遵遠渚旅泊傍孤亭月隱山容澹魚潛水氣腥草  
蟲鳴斷岸沙鳥宿寒汀最惜飄零者浮生夢未醒

宿獨鶴驛題壁

獨鶴何年去孤征此日來庭遺毛色古松帶唳聲哀清  
夢餘山月高蹤落草萊夜深思戢羽彷彿在天台

半月三度小金山

半月經三度千秋此一過驅馳憑寶筏來往任風波客  
思慙魚鳥閒心戀薜蘿是山皆可住不許竟如何

遇吳少君於西崖房賦贈

如本

邂逅南華客跣趺祇樹林蘭花蒲草侶幽鳥白雲心探  
蹟還攜杖恢諧不帶琴懸知富篇什金石已調音

牡丹鄭定夫招賞留題

性彞

姚魏名家遠繁華與衆殊香疑天上有色恐世間無帶  
露粧猶濕迎風醉欲扶東君偏為汝分外著工夫

杪秋過王良甫懸榻齋訪李白甫陸纂甫分花字

希復  
二首

早來消霧雨訪客出烟霞  
太白詩何俊士衡才亦華  
開齋當素節下榻對黃花  
一見遂相契忘言坐日斜

將往河南曉發平望

利涉非吾事侵星奈曉何  
水村浮寺遠岸火隔橋多  
千里路方積三秋日易過  
垂哀試行脚誰復慮風波

望亭夜泊

真謚  
四首

廬井臨官道人煙古望亭蓆家秋織雨田父夜占星露  
冷聞江雁燈殘見水螢孤舟慣飄泊誰復歎浮萍

答箬菴法姪過訪因憶故兄慧公

秋水蒹葭遠荒園草莽深顧余無刺語負爾獨南尋風  
雨同茲日乾坤共此心因之思大朗悽斷鵲鴝音

淮陰雨泊感賦

問俗古淮陰維舟夜雨深良弓無舊影高鳥息餘音激  
岸河聲吼迷空霧氣侵自知難乞食一飯直千金

過孔子廟

迢遙探聖域，葱鬱見宮牆。  
遺像冠裳古，斯文歲月長。  
書樓憑積氣，寢殿發幽香。  
弟子皆賢哲，窮陳若裹糧。

送崔子玉還嶺南

洪恩 十四首

名山遊殆徧，六月發新亭。  
采石潮生白，匡廬雨過青。  
土風占父老，江海按圖經。  
遲我曹溪上，南能法共聽。

懷悅觀二兄

同社人何處，飄飄信轉蓬。  
葉將秋上下，心逐路西東。  
月

色深庭樹雲容澹桂叢夢依原上鳥樓托向途中

采石謁太白祠宿蛾眉亭

乾坤空故壘樓閣壯新祠雅道存今日風儀想昔時秋  
山橫采石江月吐蛾眉一慨中流事清霜萬木悲

晚投淨居菴宿贈淨虛上人

倦欲投香榭行還戀翠微鳥翻霜葉下僧帶嶺雲歸山  
際起寒月林端收夕暉少留經一宿念爾可傳衣

淮陰經廢寺

亂石參差逕疎林薜荔牆露華團翠壁風葉埽空廊  
冷疑無火花寒忽有香簷前尋老衲炙背向斜陽

九日坐縹緲巖

不采東籬下端居縹緲峯穴猶三代俗雲護六朝松  
桂老飄金粟藤枯挂玉龍南山空有色羞自對芙蓉

同沈比部攜酒與李臨淮過劉察園分得金字

劉向傳經地休文載酒尋清風同旦暮白日自園林  
坐客憐星聚飛觴倒月深漫誇河朔事慷慨古猶今



同陳孝廉坐鳳凰臺賦贈游鹿門山人

聖代無歌鳳人猶見楚狂一臺延落日千樹醉微霜獨  
嗜鹿門隱咸稱馬氏良元龍同擊節湖海意相當

秋日送月上人省母

十載離鄉井秋風返故林拭乾拋淚眼方慰倚門心乍  
見猶疑面初聞未辨音無嫌衣太短能識別時針

吳中郭有道結閣焦山為垂老計過此以賦

舍宅明僧紹移居葛稚川江山空姓字樓閣但雲烟洞

裏餘丹籙池中盡白蓮夜深疎磬後能不詠游仙

湛懷義公與癯鶴悅公遠尋卜地緝席牛山于今  
四載餘矣義公以萬厯丙申夏日不遠千里至  
自牛峯相遇於長干舊寺因期與結制雪浪山  
中自秋及冬晤言一室上下十載有遂生平相  
得驩甚偶言及長干社事徵昔驗今念死生異  
路或南北分踪遇物興懷不勝感慨義公因作  
詩四章以紀其事予從而和之以續貂云

明珠還合浦雙劍耀豐城竹色寒增翠松顏老更清以  
吾一日長遲爾萬山盟願託茲泉石同攄畎畝情

登焦山絕頂

萬壑齊驅海雙峯對若門盡東迴地軸直北走山根沙  
市鮫人現樓居蜃氣昏桃花臨水岸莫是武陵村

其二

奔濤迴萬里竹樹一區存潮長江天白霞收海日昏彈  
丸封楚尾匹練挂吳門只欲生雙翼冷然御化鯤

同邑使君陳仲醇觴張友蓮於道院

緼袍居衛日環堵室蕭然往不排藜入行當擁杖先書  
將貧到徹人與地俱賢一乞壺中坐風餘太古前

懷谷泉

法生 二首

林間黃鵠友谷口白龍師一逐征蓬去三秋蕙草悲雲  
天飛錫遠霜浦踏盃遲應念冥棲者時攀岳桂枝

題程幕史松橋草堂

水館五株松星橋兩岸通虹飛疎雨外龍臥亂雲中秦

后行封日殷王濟涉功徒聞銀漢上別有鵲乘空

虎丘寺

僧悅 七首

一丘探勝友延坐竹間遲石肯生公法山銜短簿祠海  
雲千片冷湖月半規奇寒色深秋外西風落木悲

月下江行

水郭鄉園近漁舟處處逢斷崖陰伏雨極浦夜藏龍獨  
宿江心寺孤帆月下鐘天垂河漢淺人語隔芙蓉

投宿淨居菴

幽意率吾真秋光處處新  
亂山行不盡流水坐相親  
夢屬初中夜燈燃最後身  
石牀重覺起松月冷依人

思公留講一宿菴余慨獨往

落日戀同遊銜情兼送秋  
亂山橫暮雨千澗咽寒流  
雲際江南北天涯人去留  
繁珠殘衲下為我破窮愁

送愚公省親楚中

銜思雙親久高堂入夢賒  
楚山橫夏口漢水接長沙  
古驛晴飛雪空城寒自花  
北風吹片錫明日又天涯

與景升過郢中逢李君實暨長君元暉慨然有作  
浮雲江上色去住慘離情一鉢依僧次千山破雪行夜  
禪枯木短寒月片身輕珍重天涯遇寧無怨別生

白沙園留別張曹州兼憶郎君九華

松竹寄清脩居然名士流薜蘿三逕冷風雨一亭秋鳥  
色窺留意江聲帶別愁天涯知我在寧不念孤遊

楞嚴廢寺

福聚

憶昔曾肥遁今何屬相君古牆無剩土毀碣有遺文百

世墳仍廢千秋殿已焚惟餘松檜在長日慘寒雲

書懷

性空

古刹小江邊栖遲又幾年一從披壞衲便覺斷塵緣睡  
鶴同秋夢孤猿伴夜禪還期扶短策遠上鷲峯巔

禪僧

文石 四首

無佛亦無生曹溪祖慧能雄心肩虎兕疾眼角鸛鷹精  
粕看三藏糠粃目四乘誰知成正覺魚鳥用繁興

詩僧



不是耽佳句詞林趣未忘文章示長舌翰墨作慈航偈  
讚追東漢伽陀逼盛唐即言宣般若無字不清涼

老僧

擁衲一禪翁腰弓耳亦聾人言猶矍鑠自覺近疲癯剃  
髮刀生雪看經齒漏風日高隣叟過拭淚為談空

狂僧

狂僧餘故態不與世情居合眼看時事揚聲讀古書我  
名真腐鼠爾技自黔驢無數搶榆者圖南總笑余

寄無期道兄

斯雲四首

憶得東林社寒花動早梅離心同淨業別夢繞香臺江  
水分南北音書絕去來不辭行脚倦飛錫向天台

阻風龍潭驛

千里橫江望驚濤白馬奔征帆歇別岸飛鳥沒孤村雨  
濕春常暝天寒日易昏自憐為客久愁絕向誰論

其二

大江風浪惡顛墜客心驚津吏勞相問舟師畏逆行陰

靈蒼野積斷岸白沙橫試使身飛越還期羽翼生

其三

龍潭江上驛天遠翳寒烟泥濘難行馬風波不放船遲  
迴空白日顧值貸青錢誰謂歸無計鶯花客望懸

古今禪藻集卷二十二

欽定四庫全書

古今禪藻集卷二十三

明釋正勉釋性通同輯

明五言律詩

寄海虞吳大

德勝十二首

天地菴居僻相逢竟歲難  
白雲供臥病滄海重加餐  
花影輕風動松陰過雨寒  
起居君倘好何惜皂袍單

詩窮

人來總厭貧吾自見吾真氣色蓮花淨衣裳蘿葉新鶯啼林外曉草綠杖前春更有生涯在奚囊閣自珍

壬辰秋遼陝徵兵吳越吳越被徵者多有鬻妻孥而應感賦

忽被徵兵入淚從賣婦潯邊霜新塞騎漢月古關山天子崇神武將軍戰苦顏共知南北異去去倘生還

舊宮人

妾意終期待君恩不再私長門空買賦團扇靜題詩下

睫雙紅筋搔頭幾白絲  
花前聽玉漏常立五更遲

嘉則丈樓居談詩

一鉢何從託逶迤  
向越中山橫疑路盡  
水轉引舟通落  
日千章木虛樓萬壑風  
聽餘匡鼎說霞散赤城紅

過朱豪冠

濠濮古今意乾坤彼此情  
禽魚覺親暱林水淡幽情  
遠寺烟中塔平山樹裏城  
不知何世界那用卜居名

過雲隱菴雲棲禪士

卷二十三  
闔閭城市彷彿隔烟蘿天曠疎鐘曉霜晴落木寒青  
山高座裏碧眼暮雲端自謂遲相識論交信所難

初春對梅花憶友人渡海朝普陀山

雪霽輕寒入空齋坐亦清春深滄海色夢斷紫濤聲暮  
影中原起浮雲外國生梅花對無語何限遲君情

同諸門人宿吳興山中

落日雪溪亭僧堂雨乍醒振衣濕嵐翠開戶滴松青帆  
挂千門月溪流萬壑星爾曹全借色何以答山靈



讀王元美集

共有千秋計君其集大成物情饒品藻星壁任權衡  
滄海迴風色明河注水聲茫茫宇宙內誰敢並先生

過張孝子宅訪文學值文學病

乞食尋檀越冷然一錫餘竹邊晴曬藥花裏晝看書  
矮屋巢烏鳥平池剩鯉魚蓬蒿雖滿徑長者自停車

偶讀王元美老去急知音之句遂以為起足成八  
句用懷故同衣東塔寺六如性觀先福寺竟凡明

辨門人天寧寺公可真授

老去急知音知音成古今已無相緩急空有歎浮沈十  
載親朋淚千秋師弟心天長與地久此意轉難禁

仙巖山居

慧秀 六首

得性蒼山下藤蘿刺眼新鳥聲深在竹嵐影靜依人長  
日此玄對一生惟淨因焚香心自語吸水不嫌貧

其二

谿山吾長物來往獨關情薜荔垂如幄芙蓉削作城紫

猿驕坐樹朱鳥醉含櫻分合烟霞死寧為世網嬰

其三

日出蒼烟盡千山入望新風梳臨水樹雲逆過橋人花  
竹殊無恙茅茨未有鄰頽然自終古不是學逃秦

其四

月出山村靜松門鬼火青風泉人獨對露樹鶴常醒十  
載空銷影千秋祇汎萍自憐長策少深夜轉殘經

其五

密樹能清暑陰霞亦染衣同門二三子逸思縱橫飛踞地看青壁談天送夕暉風流映千古吾道不應微

石橋

飛梁信靈異設險化人城虹貫層崖合雷穿衆壑鳴青天水花落白日寒雲生長揖度之去灑然毛骨清

山中值湛懷師

志若 三首

踪跡彌天遠遙思河洛間我尋青嶂曲得見白眉顏道力年來健身心老更閒朝從高閣上清話雨中山

雪浪山結冬

三冬心自遠一谷乍安禪  
靜覺身為後行知戒是先澗  
昏全雜雨山曉半籠烟  
但契斯常住春風任化遷

送友還楚

大江飛白露霽月泛波紋  
吳楚山河隔乾坤杖錫分水  
流高岸見猿嘯斷崖聞金石  
交原固含悲一送君

雪夜山行

斯學十八首

孤舟疑入剡夜繞亂山行  
雪與月俱白江因人更清嵐

深寒氣重岸斷凍痕平況復人烟少空聞落雁聲

雨夜

客子久投宿主人還賃春薄衾寒入夢深雨遠沈鐘壁上燈窺鼠床頭鉢隱龍因思故山好雲濕幾株松

題海門寺

大海隔烟霧荒城涌梵宮門開春嶂雪鐘引暮潮風客社人天裏僧輪佛日東則公龕壁靜雙樹一燈紅

睦州城上

城上殘陽盡西陵晚色濃  
嶂嵐低粉雉山郡壓烏龍  
樵子雲為擔田家水作春  
萬峯秋雨過飛瀑挂芙蓉

答蘇廣宣

乍逢吳市晚片語洛陽春  
牢落猶藏俠風流不稱貧  
五陵家似水七國事成塵  
石上留明月與君觀宿因

寄吳少君山人

知君好芳草荷芰半衣裳  
一別春山綠幾經秋葉黃  
海門生片月江寺送殘陽  
曾有天台夢相攜度石梁

石帆

一片孤峯色青浮水面來誤疑江艦動陡挂石帆開扶  
國行難到桑田見幾回長風如可駕直欲訪蓬萊

與徐仲賢孝廉夜坐

城上欲棲鳥空庭下榻孤青雲在丘壑白月照菰蒲影  
自依雙樹才堪賦兩都幽驩永茲夕剪燭話西湖

與復初上人有桂花之期時夜獨坐花下對月賦  
以招之



人隔空香院寒生叢桂枝  
山中金粟願江上白雲期  
見月秋思遠臨風夜坐遲  
淮南雖有賦搖落益堪悲

果公自普陀回過宿

萬里罷行脚千峯還閉門  
無燈傳白日有客過黃昏  
風雨山中榻兵戈海外村  
因聽洛伽勝潮響雜玄言

金明寺訪肱公不值

煙水福城南無期向晚叅  
湖荒聞相國樹老隱瞿曇  
細路雲深入長廊日倒涵  
爾時還乞食龍氣暗空潭

錢長卿次卿幼卿三丈再過道林闕展待賦寄

竹房空不掩蘭棹復追尋舊雨自三益清風還此林水  
雲雙健足天地幾知心悵望西江上白蘋秋正深

寄懷吳忠伯

天涯名社散君獨締交深湖柳分青眼江花合素心片  
雲時傍水孤鷗別棲林惟有延陵舊知音不在琴

宿月闕房

祇樹如桑下還投一宿來入門寒月出掃石暝雲開落

葉分高坐飛花對辯才此時容結臘攜錫挂香臺

送陶大治入山

長揖人間世獨尋湖外山泉聲廚屋過松色石門關朝  
雨琴書冷秋雲杖屨閒理公巖洞在猿鶴伴躋攀

岳水部見過

京邑常留別鄉園此見尋買山乞士意出世使君心雲  
色停車晚松聲解帶深風期超上乘白業可中林

題瀟湘館

幽徑湘雲入叢花竹幾竿林清移席動溪碧卷簾看不  
斷三秋色長疑六月寒籜龍應自起雷雨響琅玕

行僧

萬行屬心師何煩百丈規總教盡形壽端為一修持立  
到雪深處春來米熟時苦空冰蘖念無我亦無為

憩直塢

如愚十四首

西風孤杖急窘步向荒村日出雲隨蔽山昏雨到門蟬  
聲匝樹斷秋色繞簷繁何處來砧杵催人想故園

留別因公

虛館別同倫風烟我獨親行藏休問影名實已勞神  
鋤鶴凌霄急窮猿擇木頻前途欣有託一鉢豈為貧

其二

歲晏寒霜降行人自苦心微軀蜩翼薄長路馬蹄深  
慰別仍留步相期更寄音烟霞雖萬里情在未分襟

山西道中晚行

落日他鄉客孤行何處棲人烟窮髮北風雨太行西  
霧

樹深藏寺寒流亂入溪所嗟無所向空望暮雲低

己丑春雨

春雨何其久東風未教情院花香易落梁燕乳難成寒  
釀村春嗇泥醪市馬傾都門三月半柳底未聞鶯

華頂峯

蘊麗絕羣峯藏真秀靄濃霞標出海日路引到門松赤  
井葱猶見青池墨尚封居然靈輿外萬壑暝傳鐘

法相寺禮長耳佛肉身

古佛何年逝全軀儼未終香焚存日火旛動去時風執  
破根還在情忘陰自空回觀生滅者頂禮思無窮

賦得陌上柳送王生出塞

依依陌上柳攀折不堪情眉葉含春黛腰枝度曉鶯絮  
飛陶令宅風滿亞夫營官渡年年種偏多出塞聲

甲午春日詠懷

春雪何多至嚴寒不可親一錐徒有地八口豈無身狡  
兔慚營窟饑鷹恥就人床頭瓢自挂搏擊笑生塵

其二

顛倒心難盡行藏事總迷  
祇應丘壑老翻向市朝悽  
蛩不能忘麀魚偏獨畏  
鵜何時歸短杖高臥祝融西

其三

日有三餐費難將數米炊  
養生無後策求友乏先施  
積雪壓脩竹窮陰結凍池  
首陽人可念尤羨采薇詩

其四

可笑穿楊射何如刻楮工  
縱應多注瓦寧不厭雕蟲  
梁



燕深窺雨林鳩獨喚風最憐堦下鶴軒翫意無窮

湖上唁虞長孺吏部

湖水清踰鏡憐君獨隱踪乘流親月舸開戶面雷峯得失俱非馬飛潛總是龍諒多膏沐在不必怨為容

皖山除夜示衆

兀坐寒巖下年將此夜除燈然松上燄雪擁澗邊廬新舊徒更歲死生未卜居四方雲水客箇事竟何如

宿觀音山遲陶文學不至

性通

三首

江岸葦蕭蕭千山豈憚勞  
天空容峭直峯峻太孤高  
雨雪行雙足風雷走半腰  
淵明愁酒禁不赴遠公招

送友

抱甕汲春池方將學圃畦  
盡鋤驕穉色不樹我人籬  
簡易身安便逢迎老費施  
案頭無硯筆何有送行詩

京口早發

乘船復東下早發趁江潮  
鐘斷霜千樹雞鳴月半橋  
長途隨止宿久客厭行勞  
謾謂風濤夕毘陵去尚遙

弔鄔汝翼

明曠  
四首

憐君湖海意縱死不歸家夢斷西冷月魂消北固花有  
書藏石篋無處覓星槎友誼高千古黃壚莫怨嗟

送沈勾章先生歸四明

白首天涯客相看道益尊山容藏副墨裾宵曳何門舟  
楫遵江許雲霞散石根河梁霜草色惆悵送王孫

懷母

極知深省侍無奈越山林真有分飛感難為出世心石

門選氣色板屋鬱春陰白髮高堂夢翻成游子吟

山陰道中

蘭舸逐江開秋深勾踐臺探竒從竹節即事坐莓苔白  
雁行行急丹楓樹樹摧霞標天欲赭疑是赤城來

問影

法杲 八首

夜堂孤繞座何物共徘徊奄忽吹燈去斯須起月來似  
奴家未畜疑客戶誰開折項低看汝將無汝在哉

入菴

春林重拭目片片落空花未死俱為客能安即是家十  
年藏市虎一日了弓蛇莫怪寒山笑于今笑轉賒

僦居

獨樹帶斜日脩然四壁存野花空發豔霜草自營根幻  
擬雲為路寒如雪在門彼臙安足慕名已挫乾坤

秀公楚歸蘭若被蝕作詩唁之

君自沅湘至蘿非舊日垣馬空支遁樞蠶食給孤園露  
壁花爭泣風堦草自翻寄聞當道者好為瀉金言

梁鴻溪上與潤兄夜話

扼腕悲浮俗挑燈坐夜分豺狼添夕夢蝴蝶亂秋雲玉  
楮羞工我金蘭誤識君物情奴見婢事事不堪云

焦山寄浸兄

薪水從天意蘧廬仗友生但愁衣下事安問域中名竹  
樹能相語風濤總不驚時從海門上遙看閨婆城

咏竹

最愛南崖竹蕭蕭徧法堂因風調綠影乘月度空香葉

誤溪雲亂梢凌石壁長夜深魂夢裏秋雨到繩床

秋日潤兄自洞庭見訪山中分得橋字

笠澤信迢遞霜天忽倚梳其蹤皆泛梗斯世幸同條獵  
獵風千壑蒼蒼雨一瓢白雲如有意先我候谿橋

摩雲亭夜坐

彰靜三首

孤形出林表寒色動江濱天近山欹月亭虛夜宿雲暗  
蟲藏草聒清漏帶霜分彷彿旃檀氣名香何處焚

次韻張懷禹北固齋頭

地接法王臺門當石徑開桐花留几席竹月逗莓苔野  
鳥樹邊下青山市裏來苦吟殊未已清磬一聲催

不礙亭

那堪奔勢大鬱島結滄溟石小難容膝江空不礙亭浪  
花爭笑白沙草獨含青就此窺鐫跡應非郭璞銘

宿水月居

廣製

幽居隣水郭仄徑引山房月色穿花塢鐘聲過女牆半  
憲沉暑氣片石冷湖光白髮高僧在悠悠身世忘



送友遊天台

智舷 四首

記得天台路猶然如夢中履聲山答響錫影澗浮空藤  
古全無葉松寒只有風惟應多道者神契可能同

答錢懋穀

目極高天外心懸大海隈吾將飛錫去君又寄詩來種  
秫秋能熟栽花晚自開願言茅屋下如舊長青苔

落葉

一掃一番有爭如聽自休籬根應速朽樹上豈常留既

向抽邊殞還從殞處抽若教吹不落必也歲無秋

弔竹

首尾節誰失始終心自空不能存片葉猶欲振清風想  
爾初辭籜毅然如直躬耐寒兼耐暑孰與此君同

焦山送別鄔子遠

通潤二首

送別臨厓口千峯冷翠微大呼江月出狂嘯海雲飛斷  
壁風驚帽寒潮水濺衣相逢真不易何乃即言歸

春日焦山閱楞嚴經

一枝懸笠處三月聚糧時日出人初醒春深燕不知細  
風梳石髮新水扈江離未入空王殿冥然尚有疑

登雙徑山

大泓  
四首

孤筇支曲磴雙徑上苔堯天借山青近雲分海碧遙春  
風扶雨脚香鳥挂松寮九九燈傳後西來意寂寥

弔岳武穆墓

過式英名在空山埋骨深旌旗還矯詔社稷付和金雨  
灑前朝淚風悲今日音精忠尚餘烈宰木向南森

除夕懷兄弟

爆竹聞村落還鄉思轉遥  
愁難同歲盡夢不待春招燒  
燭依孤影支身剩一瓢  
風塵走兄弟天各淚今宵

初訪道可

昔曾翻白雪今得識風儀  
雅似閒雲靜清同瘦竹奇  
讐言經通問字養鶴不循時  
莫謂論交晚忘年未遲

京口送太素遊燕

廣化

十二首

客路難為別袈裟無淚懸  
千峯寒白足一葦淡秋烟  
乞

食夷王國傳經帝子筵幽燕如踏徧歸種遠公蓮

聖水寺禮中峯雲國師塔

捫蘿石磴上孤塔雲悠悠半碣殘碑盡三朝白骨留寒  
燈明破殿片雨洗荒楸一段開山事西風黃葉秋

廣陵道中送顯弟叅憨山師

魯地餘千里拂衣寒獨行江梅催臘盡淮水入春明世  
外逢師友天南少弟兄髻珠如與示懸聽錫飛聲

輓張巨甫教授

門前胥水寒水映月明殘首猶還留筇先生已蓋棺眼  
中花影盡詩裏泣聲乾蹋盡籬邊菊難酬夢考槃

過訪韜光禪祖故院

洞冥雲歸早峯高路轉遲哲人誠逝矣古道重于斯馴  
鷗已新主啼猿猶故枝岩花空自摘胡可慰遐思

江上懷化儀徑山

憶曾留別處西水驛前亭夢裏驚春色途中換歲星雨  
來吳甸黑月出徑山青倘滌滄江足香龕就石扃

夜宿田家因贈

相逢不知姓竹榻欵高眠白髮人雙口青山水一田槿  
籬浮宿雨茅屋濕秋烟近說寬租稅床頭有酒錢

夜投慧花菴謁師

黃昏仍買渡一水就南邨路黑人歸語天寒僧閉門斷  
烟橫徑口殘雪凍籬根感切雲萍話青燈弔夢魂

壬寅正月二日初度

草色弄新烟春風一黯然律回燈下夢伎喪口頭禪顧

影羞隨世逢人怕問年梅花可無恙歲歲眼雙圓

江上懷母

旅飯他鄉久難為游子傷白頭寒枕席青線識衣裳楓  
岫三吳雨萱墀十月霜每懷門傍暮形影弔斜陽

登雨花臺

石子岡前路江橫一帶斜白雲呼不起青草夢還賒幻  
跡潜狐兔空香襲雨花不堪凋弊色寒日上袈裟

禮玄奘法師塔



牢落長干寺殘雲掩戶庭一丘寒葬骨萬里獨傳經漢  
剎燈懸紫流沙淚下青重來掃臺石花雨夢沉冥

登天台高明寺

廣印

晴日度幽溪松蘿青靄迷路隨峰上下雲逐樹高低猊  
座支郎印雞園學士題此中堪隱處應在響巖西

焦山寄友

祖印

小隱非無意清修獨不羣園蔬常自摘瓶粟與人分倚  
竹春江雨攤書暮嶺雲每逢遙夜月孤寂更宜君

焦山送友

明湛

白業為生計青山不待招倚雲窺夜月隔竹聽春潮絕  
島堪停策深林好挂瓢一枝君自取於此足逍遙

江上懷友

通凡七首

風雪聯床夜雲山憶別時客情新柳解鄉夢落梅知天  
濶雁聲遠江寒草色遲一言吾不忘曾有更來期

長橋夜泊同王朱二大行分亭字

汀草帶魚腥汀花映水亭江城連夜色沙浦動春星短

笛漁人火斜風雁塔鈴餘生良可念相聚總浮萍

和周開之賦僧院紫蝴蝶花

客有到僧院題詩翫物華忽看風外蝶幻作雨中花思  
不迷春草情堪戀晚霞芳叢好棲托寧忍過隣家

憶亡友卞天軸

一死還一生交含夙昔情埋香憐俠骨不朽是詞名志  
業竟難遂文章空早成知君無癖好那用作驢鳴

海門

江影立雙峯烟波信幾重春寒留雁驚雨急鬪蛟龍不  
盡芳洲樹頻來翠靄鐘沙頭有漁父薄暮更相逢

賦得落雁浮寒水

晴沙依獨雁汀樹帶殘秋月落隨聲度天青見影浮  
槳衣還極浦吹笛是孤舟寂莫南樓夜應多玉壘愁

過張元弢留贈

經時不出菴秋老一幽探真率成心賞英雄見手談家  
貧餘紫芋樹冷落黃柑別去如相念鐘聲湖水南

初住焦山別峯菴

智學二首

錫挂別峯西  
春江草色齊  
山高疑日近  
水遠似天低  
竹影侵階冷  
松花覆徑迷  
一枝吾欲借  
聊爾此中棲

雲聲菴贈印公

一徑臨江僻  
門開向夕曛  
舍隣鮫室近  
燈與釣船分  
山色渾兼水  
濤聲半入雲  
知君百念冷  
庭草晝氤氲

鹿門阻風

如能三首

風雨淹旬日  
無言對水流  
泥深妨舉足  
岸險怯停舟  
獨

鳥蒼烟暮寒雲碧樹秋麗公不可見空自鹿門留

秋日自在菴即事寄俞公臨山人

卑棲綠草莽秋杪興偏賒靜臥聽風葉閒行就菊花亂  
雲飛遠樹流水出寒沙為報高陽客禪房可寄家

臥病

短榻空蕭索拘拘一病身月明秋入戶風冷夜吹人氣  
盡行無力魂銷夢不真偉哉憑造化世路更何親

上方寺遲同遊不至

大壑

三首

湖光斜遶寺松影曲藏闌  
颿過烟中樹僧歸雨外山  
井梧秋更老橋蘚晚逾斑  
目極天涯盡扁舟不易還

飯華山寺弘範精舍

愛汝幽棲處松扉隔水開  
採芝人不到乞食鳥俱來  
澗黑雲歸寺巒青雨過臺  
山山香橘柚忍折一枝回

晚泊盤門因懷南屏

郭次霜嚴夜蓬淹水宿時  
忽驚冬至早始恨客歸遲  
苔或青迷徑松應翠過池  
離亭凋盡柳誰繫遠人思

登金山紫霞樓

定堅

躡屐層臺上危樓嵌碧空  
水流青嶂外人在白雲中  
木末疑天近山迴似路窮  
何當脩羽翰于此馭長風

送呂天遊還吳

如瀚  
三首

好山看欲盡言返舊林巒  
細雨千峰暮長江一棹寒  
仙踪滄海上歸思白雲端  
想到鄉園日籬花應未殘

遊古寺

千峰當落日一逕入空林  
寺古無僧住山奇有客尋  
巖



花天際落嵐翠雨餘深歸路松杉裏時聞幽鳥吟

鼓山道中

曠野澹秋色疎林澄晚晴逢樵詢古蹟隔水辨山名老  
樹半邊死寒雲隨處生禪居知不遠巖際有鐘聲

寓焦山

慧浸 二首

有閣開焦島淒風日日聞未膠千里雪欲凍一江雲帆  
折蒼山影沙留白鷺羣祇因人世隔心跡冷斜曛

山中秋暮

涼飈吹不歇巖壑倏深秋道者心能足孤雲跡自幽水  
烟橫谷口霜葉滿溪頭只合蓮峰外相期鹿豕遊

別項季興

明賢二首

倚杖青山久浮杯渡月時入林花作雨歸院鳥催詩幽  
意從招隱玄言欲問奇感君風義切行矣更遲遲

從軍行

聞出擒王帥英雄起白茅嚴城傾附螳截海射沈蛟天  
策遙尊日邊風勁折膠所嗟冰雪裏征甲幾曾拋

夜雨偶作

玄覺

木落雨瀟瀟嚴城夜寂寥  
巢寒孤鶴語雲響臥龍驕  
瀑雨階前急鄉山夢裏遙  
歸舟曾有約高枕聽江潮

九日

斯德二首

無處登高會孤吟送落暉  
菊花霜後老木葉雨中稀  
遠渚雁羣度空原人獨歸  
薄寒先中我誰為授寒衣

庚子除夕

苑彼堦前桂畸人手自我  
栽歲華今夜除身世晚年催物

我皆無盡寒暄互有來寸心非蠟炬端作不然灰

寄藕花社師

德彥七首

落落乾坤意生涯只舊林不須浮世重自有白雲深  
亂竹春風色孤燈夜雨心社中諸弟子誰可與浮沉

寄道可社弟

強扶清瘦骨好景入追尋月出蘆花渚秋高楓樹林  
星霜空屈指湖海念亡簪叔世非君應詩禪此去心

友人過訪徑山禪舍

賦命常甘病乾坤自一丘紫芝生破屋碧眼淨高秋日  
暝松烟寺天低竹嶼樓相逢聯榻夜不為話窮愁

秋日漫興

睡起衡門下惺惺萬慮空日高飛野馬天遠度冥鴻學  
道爭前列干時拜下風即今皆貴貴誰敢傲王公

其二

宇宙漂零久方知一壑安吾猶憐鍛羽誰不慕彈冠木  
落秋容瘦鵬盤暮色寒病餘來往斷何處罄交歡

送僧自楚遊燕

撮土人間世何云去路長  
瓢空燕市月衲敝楚天霜  
乞食花村暖行吟草樹香  
臨風雙碧眼幾度立高岡

過藕花師白蓮社中

追隨長恐後不惜雨中行  
鳥影雲邊濕花香鉢裏生  
屐留苔徑跡門應竹林聲  
玉貌儼然在難忘問難情

與樊公過導公村居

方擇

借爾尋田野為期十日前  
權浮寒浦雨風颺午廚烟  
紅

樹村橋遠黃花野徑偏  
劇譚今歲稔相對夜缸燃

沙河道中即事

行志 三首

野曠春陰翳途窮轉厭賒  
低頭避白日障眼憎黃沙  
水濶馬驚渡橋危人暗嗟  
閒遊亦至此誰復免離家

香樹菴

烟壑穿將盡曇花別一窩  
飯香呼鳥下瓜熟引猿過  
樹色當階古泉聲轉徑多  
何時了行腳來住此山阿

過王快鎮時余將登五臺

野曠烟無色村荒樹不皮十年勞夢想萬折此驅馳投  
憩罕香刹行瞻但廢詞豐千期不與獨往亦宜之

早秋

道耕 二首

十載竟何事支離只薜蘿壯心憐病久新句感時多夜  
色螢然草池香風觸荷有身元是患隨意學維摩

重過極樂寺與費元朗夜話

天涯成積想那得不重來旅况忽全破鄉心始半開倚  
松看碎月把臂立荒苔謾說曾無念疎鐘聽幾回



北山

弘灝 二首

幽寂北山下依巖結構偏短墻溪石壘破戶野蓬編開  
檻呼猿入穿林警鹿眠高峯遮日影滿谷冷秋烟

題林遠片石齋

片石精藍外寒光逼戶庭影由臨水碧色以上苔青瑩  
澤疑含玉稜層恐落星跣趺遺迹在好共日譚經

禮先妣殯所

佛引 二首

髻年辭世網十載隱桑門甘旨何曾供形骸空復存悲

風寒慘骨落日暗銷魂  
忍覩巢林鳥長懷反哺思

同空波休遠休明從朗  
初過楊伯翼先生殯所

孤殯非蒿里茅堂仍舊園  
小松全過閣亂竹半欹門  
才與名爭忌詩將道共尊  
無緣見顏色典則就誰論

蕭齋

圓復 二首

蕭齋無長物片石勝林臯  
蓬戶三楹小繩床八指高  
空唯觀水月靜不厭松濤  
瓦竈炊菰米青烟染布袍

謝張儒愿先生惠緇衣

檀越緇衣好何當惠野僧  
價疑纓絡重色共水雲澄  
禮佛時偏袒吟詩暫挂藤  
却思慈母線感激意彌增

夏夜聞蟋蟀

智證 三首

許大一微物動人無盡思  
不嫌催夏晚却怪先秋時  
悲斷涼風砌聲移殘雨籬  
天涯浮客鬢多為爾成絲

落葉

憐非耐寒質難禁醉霜姿  
始信叢生日不無秋後時  
辭條翻月墮飄徑掠雲吹  
寧用嗟搖落榮枯倘自知

吳無為秋水居

水淨涵茅屋斜分霜葉丹湖雲吹座濕竹色打窓寒采  
荇客為供釣魚鶴作餐無求與世合浮沒自為看

送友還蜀

讀徹

蠶叢西望險遥指青冥間短棹從天去長江今日還雲  
生連棧道月出度秦關行盡啼猿處知君兩鬢斑

聞琴

住實 二首

久坐待鳴琴高聲滿竹林調絃適緩急按指得幽深猿

鶴有清趣漁樵多古音愛君能獨操吾識子期心

落葉

枝頭動寒影蕭索下園牆別樹情何短驚風意自長庭  
前纔掃盡空裏又飛揚愁思歸無地飄飄映夕陽

穀日

法通

穀日飄風急高齋籬落寒一鳩雲外喚萬樹雨中看白  
點山人髮青登野菜盤嘉辰幸無事良久即庭蘭

過伍將軍廟有感

正勉九首

古廟蟬聲裡秋風肅將旗野花窺木主山鳥啄苔碑恨  
未收江賦忠魯入楚詞存吳應有策欲問恐還疑

寒食禮衣鉢師塔有感

靈塔香雲埒披榛作禮遲酬恩身負土頌德口為碑十  
載依慈父千秋失導師大招魂不返松樹老西枝  
弱齡送桑梓瓠落自逃禪病得醫王療才為伯樂憐談  
經當愛日執紼又重泉痛撫堦前樹星霜四九年  
村塢逢寒食孤墳覓化城時來春又去人死草還生水

月遺真性烟蘿入妄情蕭蕭松栢後疑有錫歸聲

卜居

謾說巖阿好隨緣應反招寸心忘寵辱尺地盡逍遙道  
喪無長策詩窮有破瓢春風吹竹塢滿志在鷺鷥

其二

茅屋帶沙村僧貧道自尊浮沉身是海禍福口成門用  
拙輕金甌時危失大樽滔滔天下事和俗且吹堦

其三

愚公不牧馬無慧辨妍媸應世渾占夢翻經若問奇人  
情新橐籥吾道舊鑪錘即使同朝菌榮枯亦有時

其四

風雨暮林開雙溪春水來浮天缺舟楫縮地老莓苔毀  
璞翻高價全樗故不材即今慎移竹桃李莫同栽

其五

善却螳螂臂逃禪學解牛物情鍾海藏生事托雲浮薛  
荔香堪把梅花冷結愁前途當草昧流落鳳凰洲



湖上晚眺

真澤

晚來秋氣爽觸處道機生  
僧老情塵薄交疎性地清  
峯高雙塔迥燈遠六橋明  
帶月歸林壑何妨援鶴驚

秋水

文貞二首

汨汨流無極當秋也暫平  
魚鱗分仔細鷗掌辨縱橫  
湧練月孤皎沈珠星互明  
雖非滄海量一倍勝澄清

螢火

涼天黑月夜點點亂星熒  
雨打猶難滅風吹轉自明  
低

移流水細淡挂小橋橫莫笑光微未能成車胤名

題聊齋

通衡

隱居知有道高躅與誰同柳識先生致梅兼處士風衡  
門蓮浦接茅閣板橋通杖履從茲慣相過興不窮

和聊齋

大壑四首

結廬遂幽栖聊復遺世情巖寒夏木長湖綠秋蓴生日  
夕狎魚鳥凌厲塞芳英吾貴適吾意豈必希塵纓

蓀谷

曲磴餘蒼蘚危梁度碧雲山深溪屢合樹密徑斜分  
佛火寒猶見僧鐘晝不聞空留爭席處野老自為羣

爽閣為吳中祕德聚賦

飛閣俯濠梁翳然林木蒼峰高來積翠梅早度空香  
魚鳥親行樂琴書適坐忘曇花應愛客揮麈落胡床

黃儀部貞父昔招同遊黃山以病不果有懷

春期虛折簡回首曠前期洵美宜今夕從遊豈昔時  
豁雲愁不散山雨夢相思誰謂情空盡今猶悵別離

聊齋次韵

照初

卜築閒林下，脩然寄遠情。  
種魚春水至，移柳暮烟生。  
一檻來千嶂，朱闌媚紫英。  
看君幽興發，嘯詠適簪纓。

聊齋次韵

大善

暫隱隣湖曲，幽然遠世情。  
窓中片水淨，門外兩峯生。  
塔影寫青案，山光澹紫英。  
天心在蘿薜，何用謝簪纓。

聊齋次韵

契靈


門當垂柳徑，居稱逸人情。  
鶴聽書聲慣，魚驚客影生。  
點

香持衆偈索茗賦羣英雲淨湖天暮長歌一振纓

為聊齋主人賦

性通

志士恃趨操湖南繫一瓢紫竹花籬落朱欄木板橋雪  
瀉石飛瀑風寒松弄潮半間茅屋裡獨坐聽蕭蕭



古今禪藻集卷二十三